

Inatsisissatut siunnersuummut nassuiaatit

Nalinginnaasumik nassuiaatit

1. Inatsisissatut siunnersuutip tunuliaqutaa

Pisortat aningaasartuuteqartitaanerannut piumasaqaatit sakkortusiartorput. Tamatuma kingu-nerisaanik sukkunut, sodavandinut, tupanut imigassanullu akitsuutit qaffanneqassasut siunnersuutigineqarpoq. Naalakkersuisut tamatumani aamma peqqinnissamut imigassanullu tunngatillugu politikki eqqarsaatigaat. Kingulliullugu taaneqartumut tunngatillugu aamma agguataa-rinermut politikki eqqarsaatigineqarluni, imigassanut putumanartukinnerpaajusunut akitsuut annikinnerpaamik qaffattussanngorlugu.

Matumani siunnersuummut peqatigitillugu aamma imigassat ethanolimik akullit Kalaallit Nu-naanni sananeqarsimasut akitsuutaat pillugit Inatsisartut inatsisaata allannguuteqartinnissaa-nik siunnersuut saqqummiunneqassaaq.

Inatsisissatut siunnersuutit taakkua marluk ataatsimoorlutik ukiumut 100 millioner koruuninik isertitaqaataanerunissaat ilimagineqarpoq.

2. Inatsisissatut siunnersuutip immikkoortui pingaernerit

Siunnersuutigineqarpoq sukkunut akitsuut 5,31 koruunimiit 6,00 koruunimut qaffanneqassasooq. Akitsuut kingullerpaamik 1987-imi qaffanneqarpoq.

Tamatumunna peqatigitillugu siunnersuutigineqarpoq pineqartuni akitsuutinik akiliuteqartitsisannginermik aaqqissuussineq atorunnaassasooq. Maannakut Nuuk Imeq A/S iffiorfiillu sukkunik nioqqutissanik allanik nioqqutissiornerminni atugaasa akitsuutissaagaluinik akiliisitsisoqartanngilaq. Taakkununga akiliisitsisoqartannginnermut aaqqissuussinerup nassataraa sukkut eqqunneqartut 1/3-lit kisimik akitsuuser-neqartarnerat. Sukkunik akitsuusiinermi atunerup peqqinnissaaq eqqarsaatigalugu killiliiviginiarneqarnerata tunngavigineqarnera eqqarsaatigalugu, Naalakkersuisut isumaqarput sukkunik Nuuk Imeq A/S-ip iffiorfiillu atugaasa akitsuutaannik akiliisitsisoqarqitalernissaa piffissanngortoq. Akitsuutinik akiliuteqartitsisannginnermik aaqqissuussinerup atorunnaarsinneqarnissaa Nuup Imeq A/S-ip iffiorfiillu nioqqutissanut eqqussasunut unammillersinnaassuseqarnerannut annikitsuinnarmik sunniu-teqarnissaa ilimagineqarpoq.

Siunnersuutigineqarpoq imigassanut aalakoornartortalinnut akitsuutit immiaaqqanut 14 procentimik, viinninut 22 procentimik imigassanullu kimittuunut 25 procentimik qaffakkiartortunik qaffaaffigineqassasut. Taamatut akitsuutinik allannguinerup nassatarissavaa immiaaqqamut puiaasamut (33 cl) akitsuutip 0,85 koruunimik, viinninut puiaasamut (75 cl) akitsuutip 9 koruunimik imigassanullu kimittuumut puiaasamut (75 cl) akitsuutip 53,85 koruunimik qaffannerat. Imigassanut aalakoornartortalinnut akitsuutit kingullermik 1993-imi qaffanneqarput (1996-imi viinninut akitsuutit annikitsumik allannguiffigineqarlutik).

Aammattaaq imigassanut aalakoornartortalinnut ethanolimik 1,21-2,24 procentimik akoqartunut akitsuut eqqunneqassasoq siunnersuutigineqarpoq. Tamanna nunatsinni sodavandinilianut akitsuusiinissamut siunnersuummut atatillugu isigineqassaaq. Siunnersuutip nassatarissavaa ciderit ilaasa, immiaaqqat kimikitsut assigisaallu annikitsumik ethanolimik akoqartut sodavandinut nunatsinni tunisassiarineqartuut akitsuusiinerup annertoqataanik akitsuuserneqassallutik.

Sodavandinut akitsuut literimut 3,50 koruunimik qaffanneqassasoq siunnersuutigineqarpoq. Qaffaanerup nassatarissavaa sodavandinut nammineq atugassatut eqqunneqartunut akitsuutip literimut 4 koruunimiit literimut 7,50 koruunimut qaffanneqarnera, sodavandininullu Avannaani Tunumiluunniit tuniniaqqitassatut eqqunneqartunut akitsuut literimut 2,25 koruunimiit literimut 5,75 koruunimut qaffanneqarnera. Avanna Tunulu puiaasaaqqat utertinneqartarnerannik periutsimi ilaangillat, taamaattumillu taakkunanani sodavandinik pilersuineq avataaniit eqquassinikkut pisarluni. Avannaani Tunumilu pisiniarfinni akit nunap sinnerani akinut nikingavallaannginnissaat qulakkeerniarlugu sodavandinut Avannaani Tunumilu tuniniaqqitassatut eqqunneqartunut akitsuut sodavandinut allanut akitsuummit appasinneruvoq.

Sodavandinut akitsuut 1988-imi kingullermik qaffanneqarpoq.

Sodavandinut akitsuutip qaffanneqarnerata kingunerisaanik siunnersuutigineqarpoq imeruersaatiliassat imeruersaatinut automatitigut assigisaanniluunniit automatitigut imeruersaasiassatut eqqunneqartut eqqunneqarnerannut akitsuut literimut 17,50 koruunimik qaffanneqassasoq.

Imeruersaasiassanut akitsuut 1989-imi eqqunneqarneraniilli qaffanneqarsimanngilaq.

Soorlu matumunnga peqatigitillugu imigassat ethanolimik akullit Kalaallit Nunaanni sanane-qarsimasut akitsuutaat pillugit Inatsisartut inatsisaannut allannguutissatut siunnersuummi (UKA 2007/61) saqqummiunneqartumi atuarneqarsinnaasoq aamma Naalackersuisut siunnersuutigaat sodavandinut nunatsinni sananeqartunut akitsuut literimut 3,50 kr. eqqunneqassasoq.

Siunnersuutigineqarpoq tupanut akitsuutit 17-18 procentimik qaffaaffigineqassasut. Akitsuut-tinik allannguinerit tamakkua kingunerissavaat sikaritsinut poortanut (20-nik imalinnut) akit-suut 6,80 koruunimik qaffannissaat. Tupanut akitsuutit kingullermik 2003-mi qaffaaffigineqarput.

3. Aningaasat tungaasigut allaffissornikkullu pisortanut sunniutissai

Siunnersuut allaffissornikkut annertunerusumik pisortanut sunniutissaqanngilaq.

Nioqqutissat assigiinngitsut arlaqartut eqqussuinnermut akitsuutaannik qaffaanissanik siunnersuut 2006-imi atuinertut atuneqassappat nunap karsia 2008-mi 87 mio. koruunit missiliorlugit amerlanerusunik isertitaqassaaq. 2007-imi amerlanerusunik isertitassat 8 mio. koruuninut mis-singiunneqarput. Tamatuma saniatigut aamma Pilersuisoq A/S-imi (qitiusumik peqqumaasi-vik), annertunerusumik isertitat pissarsiarineqassapput, siusinnerusukkut akitsuutinik qaffaa-sarnerni pisarsimasutut sikaritsit akii inatsisip akuersissutigineqarneraniit qaffanneqassappata. Tamatumani iluanaarutit nunatta karsianut nakkartinniarneqassapput.

Akitsuutinilli qaffaaneq annertunngitsumik annikinnerusumik atuilernermik kinguneqassasoq ilimagineqarpoq, taamaattumillu isertitassat naatsorsuutigineqartut tamakkerlugit isertinnissaat ilimagineqarani. Taamaattumik taamatut atuinikinnerulernissaq isertitat amerlassusiisigut qanoq kinguneqarnissaa oqaatiginiarnissaa ajornakusoorpoq, naatsorsuutigineqarporli atuinikinnerulernerup amerlanerusunik isertitassat 10 procentip missigisaanik appariaateqartitsineq nassatariumaaraa, (atuinerup amerlassutsitigut 1,5-ip 2 procentillu akornani atuinikinneruler-nermi) taamaasilluni amerlanerusunik isertitassat katillugit 78 mio. koruunit missaanniissasut naatsorsuutigineqarluni.

4. Aningaasaqarnikkut allaffissornikkullu inuussutissarsiuteqartuusunut sunniutissai

Siunnersuut allaffissornikkut annertunerusumik sunniuteqassanngilaq.

Qaffaatit atuisunut/tunisinermi akinut ingerlateqqinneqarsinnaatillugit siunnersuut inuussutissarsiuteqartunut aningaasatigut sunniuteqassanngilaq.

5. Avatangiisinut pinngortitamullu sunniutissai

Siunnersuut pinngortitamut avatangiisinullu sunniuteqanngitsutut nalilerneqarpoq.

6. Allaffissornikkut innuttaasunut sunniutissai

Siunnersuut allaffissornikkut innuttaasunut sunniuteqanngilaq.

7. Naalagaaffeqatigiinnermut namminersulernissamullu tunngatillugu

Siunnersuut naalagaaffeqatigiinnermut namminersulernissamulluunniit attuumassuteqanngilaq.

8. Pisortanit soqutigisaqaqatigiiffinnillu tusarniaaneq

Isertitassanik annaasaqarsinnaanissaq pinngitsoortinniarlugu siunnersuut tusarniaassutigineqarsimangilaq.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutigineqarpoq sukkunut assigiinngitsunut tamanut akitsuut 69 oorimik qaffanne-qassasoq 6,00 koruuninngorlugu.

Akitsuusiinermi ilaatigut ivigarsuarnik rooanillu, saccharose-mit akuitsumit, ahornimit, allanillu sukkuliat aammalu sirupi glukosellu pineqarput. Aamma tunisassiat allat taagorneqartunut taarsiussatut atorineqartut akitsuuteqartussaassunut ilaapput.

Nr. 2-mut

Imigassanut ethanolimik akoqartunut akitsuut immiaaqqanut 14 procentip missigisaaniit, viinninut 22 procentip missigisaaniit, imigassanut kimittuunut 25 procentip missigisaanut qaffakkiartortumik qaffanneqassasut siunnersuutigineqarpoq.

Aammattaaq nutaajusumik siunnersuutigineqarpoq akitsuusiineq imigassanut ethanolimik akulinnut 1.21-2,24-p akornani volumenprocenteqartut literimut 3,50 koruunimik akitsuuser-neqassasut. Siunnersuummi ciderinik tunisassiat ilaat, immiaaqqat kimikitsut assigisaallu imigassat ethanolimik akoqartut, sodavandinut maani nunatsinni sananeqartunut akitsuutip annertoqataanik akitsuuserneqarput.

Nr. 3-mut

Mineralvandinut, sodavandinut, limonadenut allanullu kulsyrerimik akoqartunut, imeruusaatit ethanolimik akoqanngitsutunut akitsuut literimut 3,50 koruunimik qaffanneqassasoq siunnersuutigineqarpoq literimut 7,50 koruuninngorlugu.

Mineralvandit, sodavandit limonadillu saniatigut akitsuusiinissami ilaatigut paarnat naatitallu isseri, mostit assigisaallu, imaaliinnarlugit imerneqarsinnaasut kulsyremillu akusaasut, assersuutigalugu iibilit, perit, appelsinat viinnequtillu isseri, aammalu paarnat sukkuinik, naatit isserinik imeruusaatiliat, kulsuremik akusat, aamma pineqarput.

Imigassat ethanolimik qaffasinnerpaamik 1,20 volumenprocentimik akullit ethanolimik akullittut isigineqanngillat (aalakoornartortaqaqngitsut).

Nr- 4-mut

Mineralvandinut, sodavandinut, limonadenut allanullu kusyremik akoqartunut, ethanolimik akoqanngitsunut imeruersaatinut, inuussutissarsiuteqartunit, maanna kommuniusunut Qaanaami, Ittoqqortoormiini imaluunniit Tasiilami tuniniaqqinnissaat siunertaralugu eqqunneqartunut akitsuut literimut 3,50 koruunimik literimut 5,75 koruunimut qaffanneqassasoq siunnersuutigineqarpoq.

Nr. 5-imut

Imerpallarlugit imeruersaasiassanut (sirup) kulisyremik akoqartumik automatitigut assigisaasigullu imeruersaasiornermi atugassanut, tassa imaappoq "postmixanlæg"-ini mineralvandiliassanut, sodavandiliassanut assigisaattulluunniit imeruersaatissanut eqqussinermi akitsuut siunnersuutigineqarpoq imerpallagassanut literimut 17,50 koruunimik qaffanneqassasoq.

Imerpallarlugit imeruersaasiassat, maani nunatsinni sodavandiliornermi il.il. atorneqartat akitsuuserneqassanngillat, imerpallarlugit imeruersaasiassat imeruersaasiornermi automatit allallu taamaattut atorlugit kulisyremik akullittut imeruersaasiarinissaat siunertaralugu eqqunneqartutut isigineqanngimmata.

Imerpallarlugit imeruersaasiassat kulisyreqanngitsut (saffit assigisaallu) akitsuusigassanut ilanngillat.

Nr. 6-imiit 9-mut Tobanut assigiinngitsunut tamanut akitsuut 17-18 procentimik qaffanneqarnissaa siunnersuutigineqarpoq.

§ 2-mut

Siunnersuutigineqarpoq inatsit 19. oktober 2007-imiit atuutilissasoq. Nioqqutissat piffissap ta-matuma kingornatigut akitsuuteqarfiusumut eqqunneqartut matumani allannguuni pineqartunut ilaapput. Nioqqutissat Aalborgi aqqusaarlugu umiarsuakkut nassiunneqartussat Aalborgimi nassiussassatut ulloq tunniunneqarfiat akitsuuteqarfiusumut ullormi tassani eqqunneqartutut isigineqassapput.